

摘藻堂四庫全書薈要

集部

欽定四庫全書薈要

集部

懷麓堂集卷二

二



詳校官候補通政司經歷臣郭祚熾

欽定四庫全書薈要

懷麓堂集目錄

卷一

詩稿一

古樂府一

卷二

詩稿二

古樂府二

卷三

詩稿三

長短句



卷四

詩稿四

五言古詩一

卷五

詩稿五

五言古詩二

卷六

詩稿六

五言古詩三

卷七

詩稿七

七言古詩一

卷八

詩稿八

七言古詩二

卷九

詩稿九

七言古詩三

卷十

詩稿十

五言排律

卷十一

詩稿十一

七言律詩一

卷十二

詩稿十二

七言律詩二

卷十三

詩稿十三

七言律詩三

卷十四

詩稿十四

七言律詩四

卷十五

詩稿十五

七言律詩五

卷十六

詩稿十六

七言律詩六

卷十七

詩稿十七

七言律詩七

卷十八

詩稿十八

七言律詩八

七言排律

卷十九

詩稿十九

五言絕句

六言絕句

七言絕句

卷二十

詩稿二十

七言絕句

詞曲

卷二十一

文稿一

賦

卷二十二

文稿二

序一

卷二十三

文稿三

序二

卷二十四

文稿四

序三

卷二十五

文稿五

序四

卷二十六

文稿六

序五

卷二十七

文稿七

序六

卷二十八

文稿八

序七

卷二十九

文稿九

序八

卷三十

文稿十

記一

卷三十一

文稿十一

記二

卷三十二

文稿十二

記三

卷三十三

文稿十三

記四

卷三十四

文稿十四

論

書

手簡

卷三十五

文稿十五

傳一

卷三十六

文稿十六

傳二

卷三十七

文稿十七

雜著

卷三十八

文稿十八

雜著

策問

頌

表

卷三十九

文稿十九

狀疏

卷四十

文稿二十

箴

銘

贊

引

題跋

卷四十一

文稿二十一

題跋

卷四十二

文稿二十二

誄祭文

卷四十三

文稿二十三

哀辭行狀

卷四十四

文稿二十四

墓表

卷四十五

文稿二十五

碑銘

誌銘一

卷四十六

文稿二十六

誌銘二

卷四十七

文稿二十七

誌銘三

卷四十八

文稿二十八

誌銘四

卷四十九

文稿二十九

誌銘五

卷五十

文稿三十

誌銘六

卷五十一

詩後稿一

古樂府

長短句

卷五十二

詩後稿二

五言古詩

卷五十三

詩後稿三

七言詩句

卷五十四

詩後稿四

五言律詩

五言排律

卷五十五

詩後稿五

七言排律

卷五十六

詩後稿六

七言律詩一

卷五十七

詩後稿七

七言律詩二

卷五十八

詩後稿八

七言律詩三

卷五十九

詩後稿九

七言律詩四

七言排律

卷六十

詩後稿十

五言絕句

七言絕句

卷六十一

文後稿一

賦

卷六十二

文後稿二

序

卷六十三

文後稿三

序

卷六十四

文後稿四

序

卷六十五

文後稿五

記

卷六十六

文後稿六

記

卷六十七

文後稿七

記

卷六十八

文後稿八

記

卷六十九

文後稿九

表

凡例

卷七十

文後稿十

書

卷七十一

文後稿十一

傳

卷七十二

文後稿十二

說

雜著

策問

卷七十三

文後稿十三

贊

題

銘

箴

跋

卷七十四

文後稿十四

題跋

卷七十五

文後稿十五

祭文

卷七十六

文後稿十六

墓表一

卷七十七

文後稿十七

墓表二

卷七十八

文後稿十八

碑銘一

卷七十九

文後稿十九

全
日
録
碑銘二

卷八十

文後稿二十

碑銘三

卷八十一

文後稿二十一

碑銘四

卷八十二

文後稿二十二

誌銘一

卷八十三

文後稿二十三

誌銘二

卷八十四

文後稿二十四

誌銘三

卷八十五

文後稿二十五

誌銘四

卷八十六

文後稿二十六

誌銘五

卷八十七

文後稿二十七

誌銘六

卷八十八

文後稿二十八

誌銘七

卷八十九

文後稿二十九

誌銘八

卷九十

文後稿三十

誌銘九

卷九十一

文續稿一

南行稿一

卷九十二

文續稿二

南行稿二

卷九十三

文續稿三

北上錄一

卷九十四

文續稿四

北上錄二

卷九十五

文續稿五

經筵講章

孟子直解十九首

離婁章

卷九十六
文續稿六

東祀錄

卷九十七
文續稿七

集句錄

卷九十八
文續稿八

哭子錄

卷九十九

文後稿九

求退錄

卷一百

文後稿十

求退錄

臣等謹案懷麓堂集一百卷明李東陽撰東陽字賓之茶陵人天順甲申進士官至華蓋殿大學士謚文正事迹具明史本傳東陽依

阿劉瑾人品事業均無足深論其文章則究
為明代一大宗自李夢陽何景明崛起弘正
之間倡復古學於是文必秦漢詩必盛唐其
才學足以籠罩一世天下亦嚮然從之茶陵
之光焰幾燼逮北地信陽之派轉相摹擬流
弊漸深論者乃稍稍復理東陽之傳以相撐
拄蓋明自洪永以後文以平正典雅為宗其
究漸流於庸膚庸膚之極不得不變而求新

正嘉以後文以沉博偉麗為宗其究漸流於
虛憍虛憍之極不得不返而務實二百餘年
兩派互相勝負蓋皆理勢之必然平心而論
何李如齊桓晉文功烈震天下而霸氣終存
東陽如哀周弱魯力不足以禦強橫而典章
文物終有先王之遺風殫後來雄偉奇杰之
才終不能擠而廢之亦有由矣其集舊板已

燬此本為

國朝康熙壬戌茶陵州學正廖方達所校刻凡
詩稿二十卷文稿三十卷詩後稿十卷文後
稿三十卷又襍稿十卷曰南行稿曰北上錄
曰經筵講讀曰東祀錄曰集句錄曰哭子錄
曰求退錄凡七種前有正德丙子楊一清序
及東陽自序然自序為擬古樂府作不為全
集作後人移弁全集耳乾隆四十三年正月
恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

目錄

懷麓堂集原序

古之人所以名世而不朽者有三立德立功立言是已
今天下政化出於一六經四書之旨如日麗天固無俟
於所謂立言者其見於著作若紀述鋪叙之為文詠歌
吟諷之為詩可以考見得失垂世鑒戒而興起其善端
大則用之朝廷施諸天下以鳴一代之盛謂非古者立
言之遺意哉今少師致仕西涯李先生以扶輿間氣挺
生于重熙累洽之朝弱冠入翰林已負文學重名金梓

所刻卷帙所錄幾遍海內大夫士得其片言以為至寶
後進之士凡及門經指授輒有時名中年益深造遠詣
比掌帝制登政府則又行而為經綸黼黻之文稽古代
言以定國是變士習裨政益化有非文章家之可名言
者矣且文至今日而盛而弊亦隨之故聯篇累帙盈天
壤間皆是物也其能追古名家超然自立於世者蓋亦
不數數見已自餘作者各挾所長非無足取彙而閱之
樂恣肆者失之駁而不醇好摹擬者傷于局而不暢近

或習為瘦辭硬語使人不復可句以是為古所謂以艱
深文淺近者文之弊一至是可慨也先生高才絕識獨
步一世而充之以問學故其詩文深厚渾雄不為倨竒
可駭之辭而法度森嚴思味雋永盡脫凡近而古意獨
存每吮毫伸紙天趣溢發操縱開闔隨意所如而不踰
典則彼旬鍛月鍊以求工者力追之而不可及也譬之
大人君子冠冕佩玉雍容委蛇於廟堂之上指麾百執
事各任其職未嘗有叱咤怒罵之威而望之者起敬即

之者傾心至其衆體具備無所不宜探之而益深索之而益遠則如大河之源出於崑崙至於積石又至於龍門底柱既乃吞納百川以達於海涵浴日月頃刻萬變而不知其所窮嗚呼至矣孔子曰有德者必有言先生孝友天至其素行金完玉粹名滿天下而自視歆然位極人臣而樂善如不及履常應變恒介介不易守蓋其文章與功業並懋斷有以立於世者而謂其不本之德不可也先生嘗自輯其詩文凡九十卷總名之曰懷麓

堂稿詩稿二十卷文稿三十卷在翰林時作詩後稿十卷文後稿三十卷在內閣時作外有南行稿北上錄以及經筵講讀東祀集句哭子求退諸錄則附于全稿之末以皆雜記故不入卷中徽州守熊君桂先生禮闈所取士間從所知得副本乃謀諸同知王君仲仁輩刻之郡齋走書京師索予序予辱先生知與四十年多所規益每有撰述輒為指摘疵垢不少隱顧庸惰不立少而學焉老而未能測其谿徑況望窺其室堂哉然平生企

向之懷得托姓名於不朽以為幸而熊君汲汲公善之心亦不可以不白故僭為之言先生所著別有燕對錄藏于家及密勿章疏文字甚多人不及見予承乏內閣始得窺見之若致仕以後詩文則別為續稿他日當自有傳之者正德丙子秋七月朔光祿大夫柱國少傅兼太子太傅吏部尚書武英殿大學士知制誥兼經筵官石淙楊一清撰

古樂府自序

予嘗觀漢魏間樂府歌辭愛其質而不俚腴而不艷有古詩言志依永之遺意播之鄉國各有攸宜嗣是以還作者代出然或重襲故嘗或無復本義支離散漫莫知適歸縱有所發亦不免曲終奏雅之誚唐李太白才調雖高而題與義多仍其舊張籍王建以下無譏馬元揚廉夫力去陳俗而縱其辯博于聲與調或不暇卹延至於今此學之廢蓋已久矣間取史冊所載忠臣義士幽

人貞婦竒蹤異事觸之目而感之乎心喜愕憂懼憤懣
無聊不平之氣或因人命題或緣事立義託諸韻語各
為篇什長短豐約惟其所止徐疾高下隨所會而為之
內取達意外求合律雖不敢希古作者庶幾得十一于
千百謳吟諷誦之際亦將以自考焉其或剛而近虐簡
而似傲樂易失之淫哀而不覺其傷者知言君子幸有
以正我云弘治甲子正月三日西涯李東陽撰

欽定四庫全書蒼要卷一萬六千六百三十集部

懷麓堂集卷一

明 李東陽 撰

詩稿一

古樂府

申生怨

十日進一胙君食不得嘗讒言豈無端兒罪誠有名兒
心有如地地墳中自傷兒心不如犬犬得死君傍天地

豈不廣日月豈不光悲哉復何言一死以自明

縣山怨

五蛇上天一蛇螫縣山經月火不滅君王恩重翻為仇
不如放作山中囚君王有臣一非少貪天之徒但自保
臣心見母不見君誰言母死非君恩今辰何辰夕何夕
留與千年作寒食

屠兵來

兒勿啼屠兵來趙宗一綫何危哉千金賣兒兒不死真

兒却在深山裏妾今有夫夫有子死兵易立孤難九原
下報無慚顏趙家此客還此友穿何故亡盾何走誰言
趙客非晉臣當時嬰杵為何人

築城怨

築城苦築城苦城上丁夫死城下長號一聲天為怒長
城忽崩復為土長城崩婦休哭丁夫往日勞寸築

避火行

夫人避火避火不可婦人不下堂下堂羞殺我夫人避

火避火不可我身有傳還有姆傳姆不來心獨苦君不見宋姬一卒春秋悲文姜辱死南山詩

掛劍曲

長劍許烈士寸心報知己死者豈必知我心元不死平生讓國心耿耿方在此

漸臺水

漸臺水深幾許使者來誰道汝不見君王符空傳君王語漸臺水行宮不可度妾死猶首丘君行在何處平生

委質身為君此時重信輕妾身君不還妾當死臺高高
水瀰瀰

卜相篇

家貧思賢妻國亂思良臣薦成成不知告璜璜不嗔克
也與國論此國尚有人能令汝卜相誰使汝為君東周
一失馭全晉遂三分但知晉國亂不念周家貧史官謹
初命千載傷彞倫

國士行

漆為癘炭為啞彼國士何為者趙家飲器智家頭一日
事作千年仇報君仇為君死斬仇之衣仇魄褫臣身則
亡心已矣

昌國君

齊城下即墨守燕將代昌國走卑辭累使招不歸臣心
上有先王知先王知心獨苦義君臣邦父母當時誓死
却齊封更忍還兵向燕土終不似信要劉胥報楚

樹中餓

山深雪寒路坎坷兩死何如一生可
挑才自信不如哀君若有功何必我
楚王好士得燕才燕家未築黃金臺
當時周室何為哉吁嗟乎樹中餓死
安足惜何似西山採薇食

邯鄲賈

邯鄲奇貨千金抵陽翟賈兒雙睥睨
掌珠飛墮華陽宮宮中老蚌光如虹
闕門不開玉符剖秦人河山趙人手
邯鄲種玉玉不死移向宮中生玉子
長安寶氣橫九州

卷一
賈兒身貴封為侯匹夫懷壁尚不可何怪貪兒死奇貨

易水行

田光刎頭如拔毛於期血射秦雲高道旁灑淚沾白袍
易水日落風悲號督亢圖窮見寶刀秦皇繞殿嘯且逃
力脫虎口爭秋毫荆卿倚柱笑不哧身就斧鑕甘腴膏
報韓有客氣益豪十日大索徒為勞荆卿荆卿嗟爾曹

鴻門高

鴻門高高屹屹日光盪雲霧塞雙舞劍三示玦壯士入

目皆拆謀臣怒玉斗裂網彌天龍有翼龍一去難再得
新豐行

長安風土殊不惡太公但念東歸樂漢皇真有縮地功
能使新豐為故豐人民不異山川同公不思歸樂關中
漢家四海一太公俎上之對何匆匆當時幸不烹若翁
淮陰歎

營門晝開齊犬吠蒯生相人先相背古來鳥盡良弓藏
近時刻頸陳與張功成四海身無地歸楚楚疑歸漢忌

極知猶豫成禍胎時乎時乎不再來君王恩深辯士走
淮陰胷中血一斗婦人手執生殺機赤族不待君王歸
君王歸神為惻獨不念秋毫皆信力舍人一嗾彭王殂
淮陰之辭真有無噫吁噉淮陰之辭真有無

臣不如

劉氏盟呂氏爭臣不如陵呂氏獫劉氏絕臣不如勃平
乎平乎智有餘胡為甘此兩不如茲言非智還非愚平
乎竟爾為身圖

殿上戲

殿上戲丞相嗔丞相勿嗔吾弄臣臣可弄不可狎節使
不來臣已殺君王有道臣職遂細柳營中親按轡

宜陽引

宜陽小兒身姓竇弟為傭姊為后山中岸崩壓不殺自
言相有封侯法朝上書夕召見生不記家猶記縣眼前
喜極翻作哀一朝富貴從天來左圖書右賓友兄弟賢
名世希有古來寵祿易驕奢今人尚憶貧時否

穎水濁

魏其侯家客醉舞一語不回丞相怒相家貴人半膝席
斬首穴胷那復惜籍郎按項項不俯穎川諸豪同日捕
魏其皆裂東朝東首鼠不決轅駒窮穎川水濁灌滅宗
誰令併殺老禿翁相門白日嘯二鬼越明年春武安死
誰言死速不如遲幸未淮南語世時

數竒歎

匈奴七十戰戰戰不得當一當遂失道憤激摧肝腸君

恩念數竒將令抑不揚白頭恥下獄飲泣橫干將敢也
報父讐寧為刺客死路傍隴西世節氣此志亦可傷陵
乎爾誠才胡為辱死天一方

文成死

文成封五利封神仙只在東海東文成死五利死天下
神仙皆妄耳漢家武皇帝者英昔何憐矣今何明君不
見百年身萬年計前秦皇後唐帝

牧羝曲

嗟汝陵咄汝律羝可乳節不可屈咄汝律嗟汝陵寧為
我死不作汝曹生生入朝身已老有淚猶沾茂陵草天
遣生還入畫圖不然誰識冰霜貌

問喘詞

少陽用事春猶淺道傍死人春不管丞相停車問牛喘
君不見陳平辯周勃免誰曾問春淺深牛近遠

馮婕妤好

園門晝開熊不守婕妤好當前衆嬪走荷君光寵捍君危

不然安用賤妾為君身如山妾如葉君有不虞安置妾
亦知倉卒非賈恩恩多妬深翻在睫馮婕妤好昔非勇今
非怯掖庭佞兒何喋喋

明妃怨

莫倚朱顏好妍媸無定形莫惜黃金貴能為身重輕一
生不見君王面不是丹青誰引薦空將艷質惱君懷何
似當時不相見君王幸顧苦不早不及春風與秋草却
羨蘇郎男子身猶能仗節長安道休翻胡語入漢宮祇



恐伶人如畫工畫工形貌尚可改何況依稀曲調中

九折阪

九折阪七尺身回車為孝子叱馭為忠臣孝子身為親
忠臣身為君七尺身九折道叱馭歸來人未老回頭試
問回車翁何曾得葬瑯琊草

尚方劍

中書勢重儒臣輕天下善類皆為朋漢家賢傅生負氣
死不再逢刀筆吏君王奮怒威莫當宮掖纔容免冠地

漢家佞臣多戴頭借劍不報蕭公仇當時只問安昌侯
四知歎

故人知君君不知故人下有厚地兮上有蒼旻縱不吾
知兮吾心有神金獨何為兮至吾門吾閉吾門兮省吾
身

美新嘆

昭陽禍水噴火滅賊莽勢熾哀平折宮中臘日椒酒芳
金騰策秘符命昌漢家老婦不姓呂猶握漢符為漢主

遺民獨有龔勝存餓死不入新都門美新大夫那肯死
元是五侯門下史

兩虎鬪

中原野龍鬪未休兩虎私鬪真龍憂雌虎哮風雄虎避
龍顏一開天為霽君不見邯鄲虎鬪龍不知關中祖龍
不敢欺當時豈復爭雄雌

嚴陵山

劉文叔加我足侯君房瞋我目平生若遣吾喪我有目

如盲足如跛安能城市復山林朝往暮還無不可君不見嚴陵山水高復深誰哉更識先生心

弄潮怨

莫弄潮潮水深殺人莫射潮中有孝女魂魂來父與遊
魂去父與沉潮能殺人身不能溺人心潮水有盈縮人心無古今

斷絃曲

晨聽焦桐聲夜聞斷絃音阿女有父資家學在一琴生

書五經石死給十吏札阿女有父能八分乃遺法司徒
坐上嘆胡雛別時哭阿女有父情情鍾為誰篤有書何
必教有女翻為辱君看荀爽女一死萬事足

縛虎行

布將騎公將步天下紛紛可橫鶩卿為客我為虜卿為
一言無不可下邳城南繩縛虎曹公不怒劉公怒董卓
丁原在何處布乎布乎嗟汝布

鸚鵡曲

大兒孔文舉小兒楊德祖餘子碌碌不足數身著岑牟
前擊鼓禰生狂呼老瞞沮我辱衡衡辱我我欲殺之猶
雀鼠一投荆再送楚黃鶴磯頭賦鸚鵡鸚鵡才多為舌
誤舉世何人不相妬生莫逢仇主簿

漢壽侯

漢壽侯義且武冠三軍振華夏斬仇將報知者身不可
留臣有主老瞞不追猶有度誰其仇者吳陸呂歲十二
月侯出走吳人縛侯生縛虎死猶怒髯如虬眼

如炬吁嗟漢乎天不祚有馬不踐中原土侯身雖亡神
萬古

五丈原

五丈原頭動地鼓魏人畏蜀如畏虎營門不開呼者怒
揮戈指天天宇漏將星墮空化為土鍊石心勞竟何補
侯歸上天多舊伍關為前驅張後拒忠魂不逐降王車
長衛英孫朝烈祖

東門嘯

上東門東羯雛嘯寧馨王郎識奇兆單車快馬追不還
寧知夜死排牆間當時預恐亂天下天下蒼生竟誰誤
一家三窟本身圖青州非羯還非胡何須更歎東門雛

南風歎

夕陽亭前車不發南風吹塵暗城闕凌雲醉客噤不言
蛙聲亂起華林園城頭鹿車走碌碌洛陽少年美如玉
宮中夜半牝雞啼千門萬戶皆翻覆金墉城城近遠朝
來暮去誰能免九原若見楊家姑應問婦來何大晚

聞雞行

城頭雞鳴聲不惡
祖生夜舞司州幕
南來擊楫向中流
殺氣橫秋盡幽朔
手提一劍馴兩龍
黃河以南無戰烽
十州父老皆部曲
誰遣其兒作都督
中原未清壯士死
遺恨吳江半江水

晉之東

西晉盛南風競
二十四友皆為佞
北師來東海追
四十八王皆不歸
前捧觴後執蓋
忠臣灑淚翻就
害萬里中

原士馬空銅駝尚在宮門外
宋家二帝俱入金神州
陸沉古猶今黃旗紫蓋渡江水
碧嵩清洛愁人心晉之東
非失據宋之南竟何處

伯仁怨

呼伯仁百口累卿卿不聞伯仁出
醉叱羣奴殺諸賊卿負我我負公
軍中應對聲如鐘三言不答二賢死
義未減親先殺士君不見王彬哭友
不拜兄幽冥未必無知己

氏帶箭

秦鞭斷江江逆流八公草木皆為仇
山頭鶴唳爭回首城南老氏帶箭走
雄兵百萬如倒山三十年來一翻手
君不見捫蝨翁遺言莫遣西師東
婦人孺子徒為忠燕山饑鷹思弄
風歸來但哭陽平公

五斗粟

五斗粟不屈人五株柳不出門
舉世不我容上作義皇民義皇
夢不見一枕三千春

燕巢林

胡馬來飲淮浦春
燕歸巢江樹石頭城
立不住狼居胥
在何處耕問奴織
問婢誰遣書生論
兵事萬里長城元
自棄生不逢檀道濟

耗狗歎

石頭城中鎮將死
父忠臣兒孝子袁家小兒
匿不住乳
母怒門生喜殺郎君要賊利
天地鬼神須鑒汝鬪場開
耗狗戲狗噬狂生如噬豕
狗亦有知能報主齊朝司空

空姓褚

鮮卑兒

鮮卑胡漢兒是汝奴夫為汝耕婦為汝織纊使汝溫飽
相歌呼胡為虐彼無寧居漢土著鮮卑汝客作一疋絹
一斛粟為汝擊賊使汝樂胡為疾彼同剽掠高丞相三
軍主能胡言能漢語胡為爪牙漢肝腑姦雄桀驚不足
數猶能虎視中原土君不見鮮卑小兒難共事河南行
臺徵不至

高涼洗

刺史召君勿行妾不知兵能知刺史情
刺史反君勿戰妾先請戰歸與君相見
吁嗟乎高涼娶婦得婦力不見
刺史但見賊太原亦有娘子軍
誰道軍中無婦人

涼風臺

涼風臺前池水赤赤星射空虹貫日
斛律美人生抱玦
死向青天待明月君不見晉陽書中
臨絕語曾為樂陵
求樂處百年無罪君莫冤
濟南何在是誰言不須更問

華林園

歸母怨

母告兒饑不得汝食寒不得汝衣汝身榮盛吾何為兒
告母寒不見母寒暑不見母暑死若有知應得覩齊使
還周兵起天遣來來送死洛陽不死長安死殿前一殺
數十人母身在否無兒存丁寧莫遣齊使聞

晉州急

晉州告急君莫歸勸君更為殺一圍晉州城陷君莫拔

閣裏濃粧待時發
晉州城敗君莫退
馬上著褱猶按轡
琵琶絃絕為何人
啼聲嗚嗚春向晨
當時同生願同死
各向長安作妖鬼

和士開

五雜組二美女往復來
和士開不得已出刺史
五雜組一簾珠往復來
侍中廬不得已降詔書
五雜組婁領軍往復來
賂餘珍不得已出國門

吳老公

吳老公薄心腸夕河南旦貞陽詐書實報恩作殃一身
非魏還非梁彼窮歸義棄不祥公心不薄爾可忘梁家
養客如養狼狼入彼室壞彼堂當時許媾惟朱張溧陽
公主誰家郎樂遊絲竹令人傷

長江險

長江險天可恃齊三來周再至隋兵彊竟何事兵入城
吾有計樓高入天井入地生同歡娛死同避國有二嬪
無一士回首長江如屣棄君不見古來人和方地利天

為東吳還魏帝

姦老革

姦老革天下寧有許多賊潼關以東大有人悔不盡殺
江都民民不欲多多即亂安得龍舟數千夫八萬君不
見江都城外人圖儂那能更到丹陽宮

懷麓堂集卷一

欽定四庫全書薈要卷一萬六千六百三十一

集部

懷麓堂集卷二

明 李東陽 撰

詩稿二

古樂府

太白行

太白經天照城闕
甲光侵肌冷如鐵
秦王袍沾息王血
龍攀鳳附不自由
何乃棄君來事雙
言危言逆耳誰為謀

古來天子不觀史飾詞佞筆徒為耳胡不自修為謗弭
譽樹行

莫愛庭前樹一愛百譽隨向非諫臣言不知佞者誰不
知尚自可不去安用知甘言終幸憐逆耳先防辱那將
君王樹不及大尉足

亡賴賊

亡賴賊逢人殺難當賊不平殺為佳賊臨陣殺為大將
見賊殺少年作賊不愛身逢時幸作干城臣宮中一言

後宮易終負先朝為國賊

机上肉

李唐天下猶有主兒欲與韋母欲武武家廟食唐為周
唐宗骨肉皆仇讐周迂酷吏開告密白頭司空反是實
司空不死唐不亡天意豈在廬陵王中興功業回天地
盡是司空門下吏二凶雖除五王族痛恨當年存机上
韓休知

內家伎樂喧歌酒外庭宰相還知否語罷封章驚在手

金方口人卷二
卷二
君王對鏡念蒼生一身甘為韓休瘦嗚呼曲江以後無
此賢梨園羯鼓聲震天何由再見開元年

卿勿言

卿勿言朕自思南詔覆師君不知卿勿憂朕自保范陽
弄兵苦不早卿邪誰邪高與楊非姚非宋還非張有言
如此悉不用豈有藥石鍼膏君不見咸陽老人能直
諫何曾得睹君王面

腹中劍

腹中劍中自操一日不試中怒號構仇結怨身馬逃一
夜十徙甘為勞生無遺憂死餘恨恨不作七十二冢藏
山坳

青巖山

青巖山甄郎高風不可攀祿山使者封刀還入東京見
黃蓋帝勅偽官階下拜鄭虔貶死王維生故人獨有蘇
原明君不見舞象悲啼樂工哭賊斫工屍分象肉

馬冤曲

唐家國破君不守獨載蛾眉棄城走金甌器重不自持
玉環墮地猶回首前星夜入紫微垣王風淨掃長安羶
上皇卷甲三川外父老含悲長慶前世間萬事多反覆
自古歡娛不為福君不見西宮露劍迎何如坡下屯兵
宿

曳落河

曳落河雖多如我劉秩何幕南擊劍笑且歌回紇意已
輕唐家朔風捲火隨塵沙牛車載甲空倒戈義軍四萬

同日死野老痛哭陳濤斜陳濤斜為誰哭明日上書甘
放逐

睢陽歎

將軍有齒嚼欲碎將軍有背血成淚生為將星死為厲
盡是山川不平氣二人同心金不利天與一城為國蔽
強兵坐擁瞋相視孝子忠臣竟誰是千載公名亦天意
君不見河南節度三日至

河陽戰

裨將退元帥怒先取廷玉後僕固牙旗颺地高掣空將
軍號令如雷風逆賊夜散潼關東元功獨冠中興中營
蠅菲錦難為忠空令憤死田神功

令公來

令公死回紇至今公來葛羅拜後却三軍前一騎回紇
盟吐蕃退令公度量包天地君不見長安城章敬寺眼
中那有軍容使

司農笏

司農手中無寸鐵奪笏擊賊賊腦裂賊雖未死氣已折
奉天天子雙淚橫十年棄卿真負卿臣身區區勞記憶
平原太守曾未識

養兒行

朝廷養公公養兒兒為心腹股肱誰當時意氣各相許
兒不負公公負主養兒至死心不易寧不為兒不為賊
君不見入朝告變歸殺身此兒非養寧非真養兒身死
名不腐惟有真兒心獨苦

問中使

問中使幾日發長安老臣當死死不難中使答言從大
梁至大梁賊耳胡稱使君不見吐蕃使者中道亡相臣
節度死鳳翔老姦有貌幸不揚三年飽食居廟堂澧州
客死非人殃

侍中走

平涼壇西鼓聲吼伏兵大呼侍中走君王正喜邊兵休
武將盡賀書生憂邠寧飛書夜半至西平老臣先掩涕

君心多猜謀不足平涼不伏長安伏枉伐大安園上竹

永貞歎

王郎索飯黃扉裏鄭州相公呼不起六街鬼魅夜攫人
公門白日成官市紛紛逐客不足嗟河東司馬文章家
江湖浪客河間婦世事榮枯一翻手詩翁莫賦永貞年
後來何代無此賢

鄭歇後

鄭歇後登台司國事去嗟何為唐之哀風不競天下紛

紛非一鄭君不見宋家養士得士力無數忠賢海中溺

白馬河

白馬河河水深可投清邪濁邪同一流萬古不滌衣冠
羞人生到此紛鴻毛紛鴻毛竟何益唐之亡非此日

王凝妻

妾生愛身如愛玉玉可玷身不可辱生不逢魯男子彼
氓何知妾為恥揮刀斷臂不自謀已看此臂為妾仇不
恨妾身出無主但恨妾身為婦女君不見中原將相誇

男兒朝梁暮周皆逆旅

十六州

契丹助晉兵一號三十萬晉家報契丹一數一疋絹三十萬絹未足惜一十六州空棄擲遂令宋統成偏安中原以北無幽燕金元相承二百載山前山後盡堯鎖至今五鎮接三邊不備西陲備東海

鎖繼恩

小事糊塗大事不糊塗繼恩一鎖成鴻圖太宗雄鑒絕

代無武功刎頸秦王俎當時趙相非呂徒誰復糊塗如
此乎宗乎善矣為孫謀

急流退

呂丞相眼欲穿錢樞密興已翩君有輕士心臣有制命
權命在我不在天明日拂衣遊華山

城下盟

澶州城南見黃蓋澶州城北胡兵退南朝相公方鼾睡
讒言後出功臣猜城下一盟成禍胎孤注之說何危哉

城下盟君不辱猶勝金陵與西蜀當時若恥城下盟縱
寇不追真大錯

金陵問

王安石還聖人熙寧天子空稱神程夫子真聖徒一言
非許還非諛世更有人如此無古來君相關氣運河南
不問金陵問一時言千載恨

崑崙戰

崑崙關頭戰骨枯龍衣裹血紅模糊軍中喧言老儂死

不是彼儂安有此將軍貴實不尚功世上安有將軍忠
君不見漢皇一赦雲中守武將紛紛皆藉口

安石工

端禮門金石刻丞相手書姦黨籍長安役者安石工不
識人賢愚但識司馬公卑疎不敢預國事幸免刻名為
後累匹夫憤泣天為悲黃門夜半來毀碑碑可毀亦可
建蓋棺事久乃見不見姦黨碑但見姦臣傳

夾攻誤

兩敵自相圖古稱中國利遼亡金已猖金滅元愈獠如
何夾攻策竟蹈前車弊惜哉鵝蚌功誤為唇齒累一誤
國不支再誤國不祀咄哉宋君臣千載傷失計

奇才歎

奇才復奇才二聖一語孤臣哀孤臣哀淚如雨衆欲殺
臣臣有主不然安得夢中身天上語

烏珠走

金山廟前鼓聲起江頭走却四太子緋袍玉帶墜復跳

金史卷之二十一
卷二
華人頓足金人喜君不見和尚原頭走敵胡天為中原
留是雛他時再作江南圖韓公吳公還有無

兩太師

和議是塞外蒙塵走天子和議非軍前函首送太師議
和生議戰死生國讐死國恥兩太師竟誰是

金字牌

金字牌從天來將軍慟哭班師迴士氣鬱怒聲如雷聲
如雷震三陟幽薊已復無江淮仇讐和壯士死天下事

安有此國之亡嗟晚矣

三字獄

朋黨謫天下惜惜不惜貶李迪三字獄天下服服不服
殺武穆姦臣敗國不畏天區區物論真無權崖州一死
差快意遺恨施郎馬前刺

參謀事

新將代舊將去參謀來軍有主受命犒不受戰參謀行
真獨斷宋家養兵二百秋大功竟屬書生收翻令愧死

劉揚州君不見陝西歸來笏盡地遺恨他年六州棄

千金贈

相門深深夜半扁百年恩重千金輕二人辭受本同情
君王但賞辭金名嗚呼一檜死一檜生君王孤立臣為
朋誰哉更問胡邦衡

濟陽怨

宮中快行過巷門巷中皇子心如焚相臣引入舊班裏
我胡為猶在此殿頭燭影坐者誰殿帥捽頭聽詔詞君

為臣臣就國父子幽明不相白湖州義兵翻作殃身死
猶貽諫官謫濟陽冤冤不極

金大將

汝何官金大將汝何名陳和尚好男子明白死生金人
死金鬼脛可折吻可裂七尺身軀一腔血金人憤泣元
人誇爭願再生來我家吁嗟乎文山烈後疊山已汝能
不學乃如此

戚里婿

戚里婿城貴妃社內侍董丞相無私交難共事臺兵不
待章奏批丞相出城君不知丞相出天下惑君不知竟
何國

木綿菴

多寶閣中歡不足木綿菴前新鬼哭裂膚拉脇安足論
天下蒼生已無肉君王不誅監押誅父讐國憤一時據
監押死死不滅元城使者空嘔血

冬青行

高家陵孝家陵鱗骨盡蛻龍無靈唐義士林義士野史
傳疑定誰是玉魚金粟俱塵沙何須更問冬青花徽欽
不歸梓宮復二百年來空朽木穆陵遺骼君莫悲得葬
江南一抔足

趙承旨

趙承旨誰家子王維詩畫鍾繇書不獨行藏兩相似文
山令子燕京臣臨川貢士官成均名家大儒亦如此雪
樓之徒安足齒

劉平妻

誰謂虎力猛赤手亦可屠誰謂妾無身妾身雖在不如
夫妾身與夫爭虎口生同道路死川藪呼兒拔刀兒不
怖厲聲摧山虎為沮携夫夜歸車下宿蓐食趨程烹虎
肉夫身有死死不孤生當為君西擊胡

尊經閣

尊經閣閣高不可攀前有文宣宮後有鍾陵山

花將軍歌

花將軍身長八尺勇絕倫從龍渡江江水渾提劍躍馬
走平陸敵兵不能逼主將不敢噴殺人如麻滿川谷徧
體無一刀鎗痕太平城中三千人楚賊十萬勢欲吞將
軍怒呼縛盡絕罵賊如狗狗不狺檣頭萬箭集如蝟將
軍願死不願生作他人臣部夫人赴水死有妻不辱將
軍門將軍侍婢身姓孫收屍葬母抱兒走為賊俘獻隨
風塵寄兒漁家屬漁姥死生已分歸蒼旻賊平身歸竊
兒去夜宿陶穴如生墳亂兵爭舟不得渡墮水不死如

有神浮槎為舟蓮為食空中老父能知津孫來抱兒達
行在哭聲上徹天能聞帝呼花雲兒風骨如花雲手摩
膝置泣復歎雲汝不死猶兒存兒年十五官萬戶九原
再拜君王恩忠臣節婦古稀有嬰杵尚是男兒身英靈
在世竟不朽下可為河嶽上可為星辰君不見金華文
章石室史嗟我欲賦豈有筆力回千鈞

懷麓堂集卷二



總校官庶吉士 臣張能照

校對官檢討 臣盧應

謄錄監生 臣閔思紀

欽定四庫全書薈要

集部

懷麓堂集卷
三五



詳校官候補通政司經歷臣郭祚熾

欽定四庫全書薈要卷一萬六千六百三十二

集部

懷麓堂集卷三

明 李東陽 撰

清樂詩稿三

長短句

清樂詩為天台楊允昌作

台之山石孱孱我登其巖可以振我衣台之水石齒齒
我行其止可以洗我耳山水之區我田我廬朝樵暮漁

式嘯以遊天壤之間有鳶有魚我樂我清匪物與謀悠
悠化機動靜無舍我清我樂誰知我者有懷若人莫招
爾來欲往從之室是遠而我歌此詩知者和之

捕魚圖歌

貧家捕魚多用罾富家捕魚多用網貧家不如富家利
一網得魚長數丈江花夾岸江水深此時尺魚如寸金
岸高罾小板不足漁歌哀咽愁人心家家賣魚向江浦
大船小船不知數大船魚好多得錢小船悠悠竟朝暮

長沙遊子思故鄉安得坐觀江水傍買魚沽酒對明月
我雖不飲強舉觴我家海子橋西住中使饋魚長比箸
居民未識忍獨嘗自倚闌干放教去吾生有興不在魚
披圖見畫已有餘無家無業豈足問但願四海赤子同
鮮腴

荅羅明仲草書歌

草書之妙誰絕倫我欲從之羞效顰平生兩手硬如鐵
空有苦思凌風雲羅夫子君不聞草書在意不在文十

年摹寫未必似偶然落筆還通神人道張顛看劍舞公
孫大娘出誰門始知驂騑別有骨世上豈復曹將軍羅
夫子君不見陳士謙溫元善芙蓉顏色揚柳姿能使市
上黃金賤令人好尚乃如此有眼何須辨真贗羅夫子
眼如電生來四十年閱遍圖書五千卷向來得我書贈
我一匹錦繡段吾觀少陵有詩史看君之詩宛相似包
羅巨細成大家上窮伏羲下元季秋薑冬桂老愈辣翠
竹青松寒不死君詩在格不在辭肯與時人鬪紅紫吾

觀草書亦如此羅夫子君莫疑眼中石磊落非君誰紫陽
之書冠今古其大如斗小者庖虫書鳥跡不復識見此
再拜真吾師君今長驅我戈倒縮手不搏生蛟螭長安
城西紙貴賤吾欲買斷防君嗤

題丁御史同年墨竹走筆長句

淞江之東縣新昌乃在千巖萬壑之中央側身重足恐
無路五步一澗十步岡君家茅堂此卜築白石叢抱青
篔簹西接林薄南通塘低者出地高出牆江南此物賤

如草買種不費鋤與筐野生石迸小如指一夜風吹還

尺強烟鋤雨櫛歲屢改舊葉換盡新梢長青苔白石淨
如掃吳紵越羅生雪霜脫巾箕踞坐其下野叟林夫相
與狂吹洞簫飛羽觴鳴玉琴舞霓裳陰風颭颭左右至
耳熱不受秋山涼醉中恍惚無定所顛倒萬籟隨宮商
忽妬壯士入沙場鐵騎夜蹙陰山疆不聞鼓角動但見
矛戟森開張忽如仙人來帝傍翠環金節聲鏘鏘不聞
鸞鶴叫但見雲中雙鳳凰蛟龍起舞鬼陸梁復如扁舟

渡瀟湘九疑山前鷓鴣泣二女聞之雙斷腸是時騷人
醉半醒孤棹萬里回滄浪十年宦遊隔江海此興落落
何由償深知良工心獨苦愛畫不減青琳瑯往時王孟
端近者夏太常二公之畫世所藏此物胡為在君堂君
心自有百鍊剛見此意氣俱飛揚烏臺退食宴佳客看
竹不礙肩輿郎我當攜琴載雙鶴坐子林間青石床

怡雲樓歌為樂清鮑翁作

登高樓飛甍畫棟參差浮上摩青空入倒景下瞰巨壑

通長流浮雲何悠悠層巖列岫散復收隨風冉冉不盈
寸頃刻變幻不可求盪胸引步却回首日夕坐倚可以
忘君憂雲來不作西郊雨君亦長居東海陬人生幾何
時胡為滯此山之幽世事恍惚無定所白衣蒼狗誰為
謀感茲遯跡向巖窟少年有意今白頭浮雲兮歸來與
爾散漫終林丘

題程亞卿所藏劉進畫魚

劉生亦是丹青豪近來作畫無此曹平明退直呼濁醪

半酣脫却宮錦袍戲將秃筆作鱗介已覺四壁生風濤
風濤洶湧向何處岸濶江空起烟霧東風一夜吹水渾
翠鬣紅鬢不知數桃花柳絮時吐吞輕繁亂荇交繽紛
圓光倒射日成凸滅影下沒天無痕羣嬉若共衆芳狎
遠逝忽與洪波奔千形萬態極幻化倉卒逢之安可論
就中鉅者稱赤鯢卓犖頗似鯨與鯤仰窺河漢若咫尺
俯視江海如甕盆高巖變風雨作走天吳驅海若流雲
掣電同揮霍噴沫浮漚滿寥廓鋒鏑參差見齟齬劍戟

崢嶸露頭角直遣飛騰動鬼神寧誇震撼傾山嶽若非
溟渤即洞庭不然豈得通幽靈幽靈汗漫入恍惚始信
丹青有竒骨劉生劉生良已工誰其愛者司徒公華堂
錦軸繁盈丈髣髴坐我龍門中龍門高高幾許葉公畫
龍龍出走此物胡為在庭宇知公自是人中龍會向人
間作霖雨玉如意金叵羅激高堂揚練波文王在沼民
共樂君子有酒吾當歌我生解詩不解畫潦倒不覺雙
顏酡吁嗟乎吾當奈爾丹青何

送張修撰養正擢僉都御史北巡

君不見居庸山高石磊磊西來太行走東海誰遣重城
疊嶂居其間萬古神功荷真宰南則龍樓鳳闕高巔岼
北則諸州列鎮相鈎環胡沙舊路通龍門馬營獨石俱
藩垣聖朝疆域過前古俯視朔漠之地皆中原坐開明
堂撫寰中帝遣良臣鎮茲土滿朝冠蓋瞻風雲出塞旌
旗擁貔虎張君能文復能武胸中武庫森戈矛筆下詞
鋒走風雨平生恥學儒生酸氣作虹霓向空吐朝遊玉

堂暮烏府平步青雲若廷廡手持媧皇五色之瓊瑤仰
睇高天為天補豸冠白簡凌秋霜都城滿路生輝光共
道臺臣出中祕不比御史尚書郎衣冠此事亦希有先
朝以來重紀綱北門鎖鑰付公等城塹萬仞同金湯東
闕野胡尚未降狼烟羽檄遙相望地接雲中入河外猛
士夜起提干將當令關城三百六十里亭障雖有道路
無豺狼吁嗟乎居庸真險不可當雄才逸氣直與山頡
頏諸侯有道四夷服聖德浩蕩被八荒麒麟高閣摩空

蒼巖廊屹立中昂藏金書鐵券何輝煌君乎早歸來毋
為滯此天一方

壽豈堂歌

泰和羅悅善先生以餘杭教諭致仕年七十其子璧為紹興教授從子明

仲洗馬

索是詩

羅先生晚翠之子德安之孫清談玉雪顏春溫文貞公
學行世所尊先生年二十遊其門兩家子姓諸弟昆衣
冠器業朴且敦嗟哉典刑今尚存先生六經飫千古中
年作官向吳楚當時弟子數百人三十年來半臺府先

生朝投章暮解組箕裘之子能繼武吾復何為走塵土
有田可耕有溪可漁先生之廬左琴右書豈徒玩風月
亦以忘形軀北堂老嫗頭總白筋力矍鑠不與兒童殊
向來東遊復西客夢寐得返山林居山中之樂樂只且
人皆不足我有餘嗟此不飲將何如登廟廊望江海誰
其作歌歌壽豈先生諸郎我察察尊前挂酒綠正濃籬
下菊花黃可采方當再拜祝眉壽不得登堂共班綵願
同七十還歸來門外竹林青未改

蔣御醫黃頭月桂圖

一月一花開開時月常好黃頭少年何翩翩每見花開
被花惱紅顏繡羽紛葳蕤暖風吹春春力微芳心豔影
莫相妬共保春光在遲暮君不見江花欲落江水深憑
仗黃頭過江去

三星圖歌壽致仕馬太守

給事中中錫之父

三星何光華回光下燭黃門家精靈在天光在地化作
人形與人類福星雍容豐且都翩然騎鶴乘紫虛祿星

高冠盛華裾浮雲為馭鸞為車壽星古貌長骨顱渥丹
為顏雪鬢鬚金滕玉軸藏秘符下主人壽無沉痾森然
萬象中見此三丈夫天高路遠不可呼三星三星真有
無仙翁皎皎人中星福祿而壽身康寧儼如星辰在丹
青問翁福開金壘坐華屋兒孫紛紛如立竹問翁祿象
簡緋袍佩雙玉人生五馬貴亦足况有天書照林谷問
翁壽今幾何筋力强健頭雙皤人生七十古未多翁今
况是一紀過三星在天一星在堂四星煌煌為國之光

下有文昌星炳然居其傍冠裳偉風度云是黃門郎紫
微垣高天咫尺下照后土成禎祥聖明在位世壽昌翁
百千歲長無疆年年願授長生簡寫我玉薤青琳琅

送王公濟歸武昌歌

武昌何雄哉高藩巨鎮天為開舜遣神功下疏鑿始見
長江大漢滾滾從空來連山崩騰若奔馬三十六磯水
如瀉平川渺渺原茫茫瞥視孤城如一瓦英雄割據三
千年聖代乾坤盡陶冶翬飛井絡周沓乎其間不獨帆

檣往來者吾嘗南遊吳西入楚登胭脂望鸚鵡夜月山

橫赤壁坡晴沙日射黃金浦是時懷故鄉吊前古吳周

黃晉陶庾姦如曹瞞猥黃祖餘子碌碌安足數方今修

文復偃武家詩書士冠組地靈人傑真快覩予獨無能

愧鄉土王君磊落人中豪十年書劍隨遊遨撫揮七怨

動流水點染萬象歸秋毫有時縱筆作詞賦出入經史

窺風騷豈徒文思比唐勃應遣頌聲如漢褒南宮四舉

不一薦駿馬未脫鹽車勞君今拂衣去京闕瀛海浩蕩

蓬山高高歌向空空宇潤白日鼓柁凌風濤昔作鳳朝
陽今為鶴鳴皋攜手欲止之江流正滔滔丈夫離別各
有志不學世上兒女聲嗷嗷贈君明月為鉤虹作線歸
向江頭掣巨鰲

滄海謠壽秦廷贄秋官母七十

東南何所有海與天河通天河散作億萬派下界九土
分衡從江淮河濟作四瀆長流赴海皆朝宗尾閭洩氣
石沃水其下無底歸虛空上來磅礴接混沌周環八方

此其東東乃扶桑出日之所在金烏三蹠浴影乎其中
蜃氣朝浮萬家市鰲背夜戴三山峰千年老魚化為龍
層波叠浪藏龍宮鮫綃織窻霧氣白蚌甲吐月珠光紅
鼉鼉喧呼鯀鱓舞復有三百六十鱗朋羽族紛追從咸
陽西來男女童有船不進遭回風王母西池不盈勺敢
以淺眼窺方蓬霞冠雲帔不可以髮髯俯視寰宇空塵
蒙巫山老婆年七十家居近海圓丘同挹瓢為漿釀為
酒海水照見雙青瞳烹魚炮鱉薦芳錯蛟涎香霞飄蒙

茸世人有眼不得見但見琅函寶軸名姓照耀金泥封
西曹郎君美風度皎若出海珊瑚叢攬衣望海欲東遊
須臾鞭石成長虹三神之山不老之藥倘可得願教一
粒千歲歲無終窮

滄浪吟

滄浪水清且閒朝持長竿去暮踏輕舟還江湖悠悠厭
奔走獨挂漁罾向溪口水面遊魚不避人江間白浪空
回首細草平沙帶綠蘋微風不動波粼粼忽如青絲颭

紅鱗低頭坐睡了不聞亦知在興不在物江村水市徒
紛紛滄浪水清不濁耳可洗纓可濯江南風景殊不惡
耕田不如捕魚樂我家住在瀟湘東長向滄浪憶釣翁
借問磯頭舊江水春來幾度桃花風

謝謝方石惠石碁子

天台山高東走海結為方巖石磊磊仙人巨斧劈石碎
斲出象棋三十二猶恐世人不識雲篆書刻作西京後
來字朱填墨寫部類分坐開兩壘成三軍裏藏尚帶烟

雲氣變化或驚蛇鳥羣仙人白頭朝帝閣持以贈我同
瑤琨空堂無人石枰響病骨先秋覺蕭爽杜陵畫紙那
可著火餘冷玉差能彷彿君不見越山老樵枯木柯看時
渾少別時多世間成敗等局戲何必燕然刻石高差我
不如坐共一枰晚仙人不留將奈何吁嗟乎仙人不留
將奈何

送邵國賢還治許州

許州太守西南來五馬雙旌何壯哉入門長揖向座主

元是南畿選擇之英才憶君醉下瓊林宴獨向中原領
州縣使節宣恩處處周停輶問俗村村遍州當要路多
舟車居民十室九已虛亦知聽訟事非急任道催科政
不如我方閉門讀古書聞渠此語重歎歎名途利徑人
競趨誰復有心如此歟京城六月淫雨餘漂沒禾稼傾
民廬坐令神州赤子百萬輩啼饑忍凍塞路衢翰林儒
官不涉事飽食端居豈吾意萬間廣廈何必論我屋沮
如恐無地吾聞杞憂天婺輟緯抱牟心揮賈涕敢言民

社非我圖耐有閒情為君計大河南北多荒田二年水
旱相纏綿江流轉徙無定所直指梁汴窺藩垣誰將隻
手障百川向來議者塞與遷問君此策竟安出自言地
踈官復小有口不敢如河懸茲州自古無水患亦有平
原沃壤遙相連古稱苛政猛於虎或者有患如水然息
爭止暴是君事百姓方賴太守賢賜金贈秩豈足為子
望望子不在文章傳

平湖十詠為過郎中大僕作

武湖春色

春來武湖綠春去武湖深清波帶碧草幽鳥啼芳林寧
獨知春來與春去長在武湖湖上住

案山曉翠

遠山青青玉案氣漫漫開爽且君不見樂遊原上易黃
昏夕陽雖好空魂斷

三寺雨鐘

朝鐘晴昏鐘雨朝鐘滿空山昏鐘遙遙不知處山僧報

客客不來又逐溪風過溪去

六橋晴市

六橋東西南北水橋為村水為市昨日雨多今日晴高樓翠幔紛縱橫搖湖船卧明月歸來夢作杭州客

東田社鼓

日之出東田東鼓填填走社翁割肥羊擊豕舞復歌社神喜但願年年好風雨儂衣有桑食有黍長迎社神擊社鼓

西浦漁畧

儂家住西浦兒童識畧畧畧高岸濶秋水深湖上魚鰕
賤如土待我他時歸挂畧功成自買扁舟去

南村書堆

村舊住
張氏

南村書屋書滿車南村書聲聲滿家讀書不作村學究
身為郎官印如斗如今祇合稱書鄉不獨書堆人姓張

北原牧唱

北原草青牛正肥牧兒唱歌牛載歸兒家在原牛在坂

歌聲漸低人更遠
山蒼茫水清淺

霍氏行祠

霍將軍誰遣汝廟食
吳山下揚靈旗耀靈馬
神遊四方適余野
霍將軍武且神驅逐厲鬼
鞭風雲生能安邦死能福
吾民壯哉將軍死猶存

魯公古墓

荒荒高原鬱鬱古墓誰其
葬之侯姓魯君看佩銅章
繫青組有酒誰澆墓傍土
彼獨何人民亦何心嗟哉
魯侯

名至今

山水圖為曰會中書題送體齋先生

洪都山高章水深五湖為帶江為襟臨江郡城瞰空碧
上有玉筍凌千尋下有渝川一道清徹底雕甍畫棟光
沉沉誰其居之傳巖後天遣山川毓靈秀四山幽鳥啼
深春萬點濃花亂晴書吾嘗挹羣芳披衆皴躡雲根覘
天竇書聲出谷秋籟鳴壁彩穿林夜光漏樵童牧豎不
敢溷跡乎其間獨有仙風折長袖仙乎仙乎飛絕塵一

住京華三十春蓬山弱水豈不樂望裏鄉關天外身
書驛騎隨車輪倏忽三尺如有神謫仙夢寐本為幻季
卿圖畫元非真何如錦袍金帶佩雙玉解使中原識鳳
麟君家兄弟如兩謝猶有惠連居鳳舍天涯去住各關
情雖步江山不相借借君彩筆賦君詩仙乎早和凌雲
詞瓊林玉樹遠在萬里外誰道弟寒兄不知

孤鴻怨題東吳張節婦卷張自云飛鴻且不再
匹况於人乎

翩翩天上鴻一死不再匹今人鳥不如有匹奚但一生
為比翼死獨棲寧忍孤飛過別枝養雛成翮老相似猶
憶當年初奠時妾心獨知人不識仰視飛鴻指白日

慰帛圖

慰帛復慰帛一日能幾匹貧家日短富日長同是一般
辛苦力貧家莫歎慰帛勞猶勝家貧無帛慰

懷麓堂集卷三